

UNIVERZITET U SARAJEVU – PRAVNI FAKULTET
KOMISIJA ZA IZBOR NASTAVNIKA/ICE U ZVANJE REDOVAN/A PROFESOR/ICA
NA NAUČNOJ OBLASTI KRIVIČNO PRAVO

Sarajevo / Split / Zagreb, 10.02.2025. godine

UNIVERZITET U SARAJEVU
PRAVNI FAKULTET

Broj: 01-147/25
Datum; 12. 2. 2025 god.

VIJEĆU UNIVERZITETA U SARAJEVU – PRAVNOG FAKULTETA

PREDMET: Izvještaj sa prijedlogom za izbor u akademsko zvanje redovan/a profesor/ica na naučnoj oblasti Krivično pravo

Podaci o objavljenom konkursu, imenovanju i radu Komisije za izbor jednog nastavnika/ice u zvanje redovnog/e profesora/ice na naučnoj oblasti Krivično pravo

- a) Na osnovu člana 121. Zakona o visokom obrazovanju Kantona Sarajevo iz 2022. godine (dalje: ZVO 2022)¹ i člana 233. Statuta Univerziteta u Sarajevu, broj: 01-14-35- 1/23 od 26.7.2023. godine (dalje: Statut), a u skladu sa Odlukom o usvajanju dinamičkog plana potreba Univerziteta u Sarajevu - Pravnog fakulteta za raspisivanjem konkursa za izbor u zvanje u akademskoj 2024/25. godini br. 01-1160/24 od 04.09.2024. godine, te Odluke Senata Univerziteta o davanju saglasnosti na raspisivanje konkursa, br. 01-8-17/24 od 18.12.2024. godine, Univerzitet u Sarajevu - Pravni fakultet raspisao je konkurs za izbor u akademsko zvanje - **nastavnik/ica u zvanje redovni/a profesor/ica na naučnoj oblasti Krivično pravo**, 1 izvršilac, puno radno vrijeme.
- b) Konkurs je objavljen 30.12.2024. godine u dnevnom listu „Dnevni avaz“, na službenoj internet stranici Pravnog fakulteta (www.pfsa.unsa.ba), te službenoj internet stranici Univerziteta u Sarajevu (www.unsa.ba).
- c) Nakon isteka roka za prijave na Konkurs, na osnovu člana 123. ZVO 2022 i člana 236. Statuta, Vijeće Univerziteta u Sarajevu - Pravnog fakulteta (dalje: Fakultet) je na 78. vanrednoj (elektronskoj) sjednici održanoj dana 24.01.2025. godine u periodu od 08:00 do 12:00 sati, donijelo **Odluku o imenovanju Komisije za izbor jednog nastavnika/ice u zvanje redovnog/e profesora/ice na naučnoj oblasti Krivično pravo** br. 00-69-1/25, od 24.01.2025. godine (dalje: Komisija), u sastavu:
 - akademik, dr. Borislav Petrović, profesor emeritus Univerziteta u Sarajevu – Pravnog fakulteta na naučnoj oblasti Krivično pravo, predsjednik i član;
 - dr. Anita Kurtović Mišić, profesorica emeritus Sveučilišta u Splitu – Pravnog fakulteta na naučnoj oblasti Kazneno pravo, članica;

¹ Sl. novine Kantona Sarajevo, br. 36/2022.

- dr. Davor Derenčinović, redovni profesor u trajnom zvanju na Sveučilištu u Zagrebu – Pravnom fakultetu na naučnoj oblasti Kazneno pravo, član.
- d) Odlukom o imenovanju Komisije za izbor jednog nastavnika/ice u zvanje redovnog profesora/ice na naučnoj oblasti Krivično pravo br. 00-69-1/25., od 24.01.2025. godine, u skladu sa članom 236. stav 4. Statuta utvrđena je i adekvatnost naučnih oblasti na koju su izabrani članovi Komisije dr. Anita Kurtović Mišić, profesorica emeritus i prof. dr. Davor Derenčinović, obzirom da su u akademska zvanja izabrani na drugim univerzitetima/fakultetima, a ne na Univerzitetu u Sarajevu (dalje: Univerzitet).
- e) Navedenom Odlukom je utvrđeno da je zadatak Komisije da pisani Izvještaj sa prijedlogom za izbor u akademsko zvanje dostavi Vijeću Univerziteta u Sarajevu – Pravnog fakulteta u roku od 30 dana od imenovanja.

U skladu sa odredbom člana 256. stav (1) i (2) Statuta Komisija je 04.02.2025. godine održala konstituirajuću (on-line) sjednicu na kojoj je usvojila Poslovnik o radu, te uz prisustvo predstavnika Stručne službe Fakulteta otvorila pristigle prijave. Na raspisani konkurs **pristigla je jedna prijava** koju je **podnijela dr. Amila Ferhatović**, vanredna profesorica Univerziteta u Sarajevu - Pravnog fakulteta na naučnoj oblasti Krivično pravo.

Uvidom u prijavu dr. Amile Ferhatović, Stručna služba fakulteta je konstatala da je kandidatkinja uz svojeručno potpisanu prijavu na konkurs priložila sljedeće dokumente:

1. biografiju sa bibliografijom – Akademski *curriculum vitae*;
2. ovjerenu kopiju diplome o sticanju naučnog stepena doktora pravnih nauka;
3. ovjerenu kopiju diplome o sticanju naučnog stepena magistra pravnih nauka;
4. ovjerenu kopiju diplome o završenom studiju za sticanje visoke stručne spreme;
5. Potvrdu dekanice Univerziteta u Sarajevu – Pravnog fakulteta o radnopravnom statusu (radni odnos s punim radnim vremenom s naznakom akademskih zvanja i perioda) počev od 1.11.2006. godine;
6. Odluku Senata Univerziteta u Sarajevu o izboru u zvanje vanredne profesorice;
7. Odluku o imenovanju prodekanice Univerziteta u Sarajevu – Pravnog fakulteta;
8. Listu objavljenih knjiga i naučnih radova od izbora u zvanje vanredne profesorice, kao i same knjige i kopije radova;
9. podatke i dokaze o originalnom stručnom uspjehu kao što je projekt/nagrada;
10. podatke i dokaze o uspješnim mentorstvima: pri izradi i odbrani trideset sedam (37) završnih radova (28 na II ciklusu studija Univerziteta u Sarajevu – Pravnog fakulteta i 9 na Diplomskom studiju Kriminalistika i sigurnosni menadžment na Sveučilištu u Mostaru – Pravnom fakultetu); pri izradi i odbrani dvije (2) doktorske disertacije na doktorskom studiju (jedno uspješno mentorstvo na III ciklusu Univerziteta u Sarajevu – Pravnog fakulteta i jedno uspješno mentorstvo na Poslijediplomskom doktorskom studiju iz pravnih znanosti (III ciklus studija) na Sveučilištu u Mostaru – Pravnom fakultetu);
11. dodatnu dokumentaciju kojom se dokazuju ostvareni rezultati u oblasti naučnog i nastavnog rada.

U skladu sa odredbom člana 256. stav (2) Statuta izdata je Potvrda o potpunosti (urednosti) prijave dr. Amile Ferhatović na konkurs za izbor jednog nastavnika/ice u zvanje redovnog/e profesora/ice na naučnoj oblasti Krivično pravo, broj: 01-126/25 od 04.02.2025. godine kojom se konstatira da je podnesena prijava shodno raspisanom konkursu: blagovremena (podnesena u roku određenom u konkursu), potpuna (priloženi svi dokazi o ispunjenosti uslova za izbor u zvanje redovnog/e profesora/ice), te vlastoručno potpisana od strane podnositeljice.

Nakon što je razmotrila prijavu i priloženu dokumentaciju kandidatkinje, Komisija podnosi sljedeći

IZVJEŠTAJ

1. Prijava kandidata/kinje

Dr. Amila Ferhatović konkurirala je za izbor u zvanje redovne profesorice na naučnoj oblasti Krivično pravo. Podnesena prijava, shodno raspisanom konkursu, je blagovremena (podnesena u roku određenom u konkursu: 10.1.2025. godine), potpuna (priloženi svi dokazi o uspunjenosti uvjeta za izbor u zvanje redovne profesorice shodno zakonskim i statutarim odredbama), te vlastoručno potpisana od strane podnositeljice.

Prema odredbi člana 176. ZVO 2022 (*Prelazni period u vezi sa izborima u akademska zvanja*) svi članovi akademskog osoblja koji su izabrani u akademsko zvanje prema odredbama zakona koji prestaje da važi njegovim stupanjem na snagu zadržavaju pravo da budu izabrani u isto ili više akademsko zvanje prema uvjetima propisanim ranijim zakonom. Ovo pravo važi samo za jedan izborni period u isto ili više akademsko zvanje. Shodno odredbi stava (3) ovog člana visokoškolska ustanova, odnosno članica, raspisuje tek sljedeći konkurs za izbor u zvanje u skladu sa novim zakonom, te je predmetni konkurs raspisan u skladu sa odredbama Zakona o visokom obrazovanju Kantona Sarajevo iz 2017. godine (dalje: ZVO 2017)², odnosno u skladu sa uvjetima za izbor u zvanje redovnog profesora/ice koje je propisivao član 96. stav (1) tač. f) tog Zakona.

Odredbom člana 96. stav (1) tač. f) ZVO 2017 propisani su sljedeći uvjeti za izbor u akademsko zvanje redovni/a profesor/ica:

- proveden najmanje jedan izborni period u zvanju vanrednog profesora,
- najmanje osam naučnih radova objavljenih u priznatim publikacijama koje se nalaze u relevantnim naučnim bazama podataka,
- najmanje dvije objavljene knjige,
- originalni stručni uspjeh kao što je projekt, patent ili originalni metod,
- uspješno mentorstvo najmanje po jednog kandidata za stepen drugog odnosno integriranog ciklusa studija i trećeg ciklusa studija.

² Sl. novine Kantona Sarajevo, br. 33/17, 35/20, 40/20 i 38/21.

2. Pravni osnov za postupanje Komisije

Na osnovu raspisanog konkursa, u postupku za pripremanje prijedloga za izbor u akademsko zvanje redovnog/e profesora/ice na naučnoj oblasti Krivično pravo, Komisija procjenjuje ispunjenost uvjeta za izbor koji su utvrđeni ZVO 2017 koji je prestao da važi i Uputama o realizaciji izbora u isto ili više akademsko zvanje na Univerzitetu u Sarajevu u skladu sa uslovima propisanim ranijim Zakonom (broj: 01-15-29/23 od 27.09.2023. godine, dalje: Upute), a primjenjuje procesna pravila koja su utvrđena važećim ZVO 2022 i Statutom.

3. Osnovni biografski podaci

Dr. Amila (Jusuf) Ferhatović rođena je 26.09.1979. godine u Bijeljini. Osnovno i srednje obrazovanja sticala je u Bosni i Hercegovini i Njemačkoj. Diplomirala je 19.12.2005. godine na Pravnom fakultetu Univerziteta u Sarajevu i stekla stručno zvanje/naziv: diplomirani pravnik. Na istom Fakultetu kandidatkinja je 07.09.2009. godine odbranom magistarskog rada na temu „Pretresanje i pregled stana, drugih prostorija i osoba“ stekla zvanje magistra pravnih nauka. Naučni stepen doktora pravnih nauka stekla je 21.03.2014. godine na Pravnom fakultetu Univerziteta u Sarajevu odbranom doktorske disertacije pod nazivom „Pokušaj krivičnog djela u zakonodavstvu, teoriji i praksi“. Od novembra 2006. godine zaposlena je na Pravnom fakultetu Univerziteta u Sarajevu u sljedećim naučno-nastavnim zvanjima:

- 1) **asistentica** na predmetu Kriminologija (novembar 2006. – decembar 2009. godine),
- 2) **viši asistentica** za oblast Krivično pravo na predmetima Krivično pravo I, Krivično pravo II, Međunarodno krivično pravo, Kriminologija i izborni predmeti iz naučne oblasti (decembar 2009. – septembar 2014.),
- 3) **docentica** na obaveznim i izbornim predmetima naučne oblasti Krivično pravo (septembar 2014. – maj 2019.) i
- 4) **vanredna profesorica** na obaveznim i izbornim predmetima naučne oblasti Krivično pravo, Odluka Senata Univerziteta u Sarajevu o izboru u zvanje vanredne profesorice broj 01-14-32/19 od 27.05.2019. godine (izborni period šest godina: 27.05.2019. – 27.05.2025. godine).

Zaključak I

Dr. Amila Ferhatović ispunjava uvjet vezan za proveden najmanje jedan izborni period u zvanju vanredne profesorice obzirom da se procedura za izbor člana akademskog osoblja u isto ili više zvanje u skladu sa dinamičkim planom potreba pokreće najkasnije četiri (4) mjeseca prije isteka izbornog perioda postojećeg člana akademskog osoblja, a najranije šest (6) mjeseci te da se ne smatra prijevremenim izborom (član 121. stav (2) ZVO 2022). Početak procedure u skladu sa Uputama vezuje se za raspisivanje, odnosno javnu objavu konkursa. Konkurs je raspisan blagovremeno, 18.12.2024. godine, dakle, pet (5) mjeseci prije isteka izbornog perioda.

4. Dosadašnje naučno i stručno usavršavanje

U cilju kontinuiranog naučnog i stručnog usvršavanja, kandidatkinja je pohađala i bila učesnica više različitih kurseva, radionica, seminara, edukacija, domaćih i međunarodnih skupova.

Znanje i vještine kandidatkinja je usavršavala i kroz različite studentske boravke:

- Njemačka: Max-Planck-Institut za uporedno i međunarodno krivično pravo, juni 2008. godine;
- Njemačka: Institut za istočnoevropske studije Slobodnog Univerziteta u Berlinu, jedan semestar 2011/2012. godine;
- Njemačka: Institut za njemačko, evropsko i međunarodno medicinsko pravo, zdravstveno pravo i bioetiku Univerziteta u Heidelbergu i Mannheimu, januar 2013. godine;
- Turska: Univerzitet u Istanbulu, Pravni fakultet, dva semestra, 2012/2013. godine;
- Sjedinjene Američke Države: DePaul University, Chicago, septembar 2015. godine.

Nakon izbora u zvanje vanredne profesorice, kandidatkinja je učestvovala u radu i imala izlaganja na brojnim međunarodnim konferencijama i kongresima, od kojih je izdvojila posebno:

- 3. Kongres krivičnog prava "Humboldt-Kolleg Istanbul 19-jähriges Jubiläum der türkischen Strafrechtsreform", na temu "Wissen- Wollen- Wirren- Beweisen - Über die Bedeutung der Wissens- und Willensforschung für die strafrechtliche Verantwortlichkeit" u organizaciji Bilgi Univerziteta u Istanbulu i Alexander von Humboldt fondacije, koji se održavao od 1. do 4.6.2024. godine u Istanbulu. Izlaganje je bilo na temu **„Die Reformierung der Antikorruptionsgesetze in Bosnien und Herzegovina“** u koautorstvu sa višom ass. Kanitom Pruščanović, Mr. iur.
- 13th International Crime and Punishment Film festival „Freedom of expression“ sa akademskim programom, koji se održavao u od 17. do 23.11.2023. godine u Istanbulu. Izlagala je na temu **„Hate Speech in Case Law in Bosnia and Herzegovina“** u koautorstvu sa višom ass. Kanitom Pruščanović, Mr. iur.
- Konferencija u okviru FIGAP II Programa u organizaciji Gender Centra Federacije Bosne i Hercegovine pod nazivom Multidisciplinarni pristup prevenciji i borbi protiv femicida i nasilja u porodici, koja se održavala u Sarajevu, 6. i 7.12.2022. godine. Izlagala je na temu **„Femicid – prevencija kao multidisciplinarni pristup“**.
- II Kongres Ljekarske/Liječničke komore FBiH sa međunarodnim učešćem na temu „Medicinsko pravo“, 11. - 13.11.2022. godine, koji se održavao na Medicinskom fakultetu Univerziteta u Tuzli. Izlagala je na temu **„Razvoj i perspektiva medicinskog krivičnog prava u Bosni i Hercegovini“** u koautorstvu sa višom ass. Kanitom Pruščanović, Mr. iur.
- 10th International Crime and Punishment Film Festival sa akademskim programom na temu „I am innocent“, koji se održavao u Istanbulu od 20. do 26.11.2020. Izlagala

je na temu „**The Presumption of Innocence in Bosnia and Herzegovina’s Criminal Law**“ u koautorstvu sa Kanitom Pruščanović, Mr. iur.

- Tripartitna konferencija VIII Bosanskohercegovačko-hrvatsko-turski pravnički dani pod nazivom „Prednosti alternativnog rješavanja sporova“, koja se održala 06.04.2019. godine u Sarajevu. Izlagala je na temu „**Kućni zatvor sa elektronskim nadzorom**“ u koautorstvu sa prof. dr. Borislavom Petrovićem i višom ass. Kanitom Pruščanović, Mr. iur.

Kandidatkinja je aprila 2017. godine položila pravosudni ispit pri Ministarstvu pravde Republike Srpske.

Govori tri strana jezika: njemački, engleski i turski, što joj omogućava da čita, piše i predaje na tim jezicima. Tako je bila i povremeni predavač na temu njemačkog krivičnog prava na njemačkom jeziku u okviru „Pratećeg studija“ na Pravnom fakultetu u Sarajevu u organizaciji Njemačke fondacije za međunarodnu pravnu saradnju (IRZ).

5. Pregled bibliografskih jedinica kandidatkinje

5.1. Bibliografske jedinice objavljene prije izbora u zvanje vanredne profesorice

5.1.1. Knjige

- Krivično pravo I. Pravni fakultet Univerziteta u Sarajevu, Sarajevo, 2015., (u koautorstvu sa: Petrović Borislavom i Jovašević Draganom), COBISS.BH-ID 22430470.
- Krivično pravo II. Pravni fakultet Univerziteta u Sarajevu, Sarajevo, 2016., (u koautorstvu sa: Petrović Borislavom i Jovašević Draganom), COBISS.BH-ID 22792966.

5.1.2. Naučni radovi

- Ferhatović, A. & Boban, H. (2017). Oduzimanje imovinske koristi pribavljene krivičnim djelom u Federaciji Bosne i Hercegovine. Godišnjak Pravnog fakulteta u Sarajevu, LX, 153-179.
- Ferhatovic, A. (2017). Fight Against Terrorism – Between Ideal and Reality Country Report Bosnia and Herzegovina. In: 7th International Crime and Punishment Film Festival „Protection of the Rule of Law Against Terrorism and the Coups“ (p. 7-14). Istanbul.
- Petrović, B. & Ferhatović, A. (2017). Mjere bezbjednosti medicinskog karaktera i materijalno krivično zakonodavstvo Bosne i Hercegovine. U: Mere bezbednosti medicinskog karaktera – pravni i medicinski aspekt (regionalna zakonodavstva, iskustva u primeni i mere unapređenja (str. 191-205). Misija OEBS-a u Srbiji.
- Ferhatović, A. (2016). Izvršenje sudskih presuda kojima je određeno oduzimanje imovinske koristi pribavljene krivičnim djelom. U: Mujanović, Eldan, Datzer, Darko,

ur., Oduzimanje imovinske koristi pribavljene krivičnim djelom – Priručnik za praktičare. Sarajevo: CPRC, str. 104-127.

- Ferhatović, A. (2016). Sentencing of Drug Offenders: Legislators' Policy and the Practice of the Courts - Country Report Bosnia and Herzegovina (p. 57-95). Athens-Thessaloniki: Sakkoulas Publications.
- Ferhatović, A. (2016). Zloupotreba položaja ili ovlaštenja u zakonodavstvu i praksi. Godišnjak Pravnog fakulteta u Sarajevu, LIX, 9-33.
- Ferhatović, A. & Mujanović, E. (2015). Samostalno oduzimanje imovinske koristi (oduzimanje u odsustvu osuđujuće presude). Godišnjak Pravnog fakulteta u Sarajevu, LVIII, 33-53.
- Ferhatović, A. (2015). Pokušaj krivičnog djela u zakonodavstvu i praksi Turske. Godišnjak akademije pravnih znanosti Hrvatske, VI, 1, 151-169.
- Petrović, B. & Ferhatović, A. (2015). Criminal Sanction - Country Report for Bosnia and Herzegovina. 2nd Criminal Law Reforms Congress (p. 465-497). Istanbul: University in Istanbul.
- Ferhatović, A. (2014). Pokušaj krivičnog djela u zakonodavstvu Bosne i Hercegovine i Turske – komparativnopravna analiza. Zbornik radova sa Međunarodne naučno-stručne konferencije Izgradnja modernog pravnog sistema (str. 775-798). Sarajevo: Internacionalni Burch univerzitet, Centar za društvena istraživanja.
- Hadžić, M. & Ferhatović, A. (2014). War migrations in Bosnia and Herzegovina (1992-1995). 4th International Crime and Punishment Film Festival Migration (p. 604-613). Ankara: Adalet Yayınevi.
- Ferhatović, A. (2014). Teorije o pokušaju. Godišnjak Pravnog fakulteta u Sarajevu, LVII, 79-100.
- Petrović, B. & Ferhatović, A. (2013). Uvjetni otpust u savremenom krivičnom zakonodavstvu. Godišnjak Pravnog fakulteta u Sarajevu, LVI, 89-113.
- Ferhatović, A. (2012). Zloupotreba položaja ili ovlaštenja. Godišnjak Pravnog fakulteta u Sarajevu, LV, 147-180.
- Ferhatović, A. (2011). Pretresanje stana, prostorija i osoba. U: Petrović, Borislav, ur., Istraživanje krivičnih djela. Sarajevo: Pravni fakultet Univerziteta u Sarajevu, str. 310-355.
- Sutović, A. & Ferhatović, A. (2010). Bitno smanjena uračunljivost. Godišnjak Pravnog fakulteta u Sarajevu, LIII, 431-462.
- Ferhatović, A. (2009). Pravni aspekti pretresanja u njemačkom zakonodavstvu. Godišnjak Pravnog fakulteta u Sarajevu, LII, 93-104.
- Petrović, B., Jovašević, D. & Ferhatović, A. (2006). Izvršenje vaspitnih mjera. Pravna riječ, III, 7, 371-394.

5.2. Bibliografske jedinice objavljene poslije izbora u zvanje vanredne profesorice

5.2.1. Knjige

Kandidatkinja je dostavila dvije (2) objavljene knjige/ univerzitetska udžbenika koja će biti predmetom ocjene od strane Komisije.

1. **Krivično pravo opći dio, Univerzitet u Sarajevu – Pravni fakultet, Sarajevo, 2024.** (u koautorstvu sa Borislavom Petrovićem i Draganom Jovaševićem), ISBN 978-9926-544-09-06, CIP zapis dostupan u COBISS sistemu Nacionalne i univerzitetske biblioteke BiH pod ID brojem 62410246

Predmetni univerzitetski udžbenik pisan je sa namjerom da posluži studentima/cama pravnih fakulteta u Bosni i Hercegovini kao osnovni udžbenik za izučavanje materije Krivičnog prava opći dio. Toj osnovnoj namjeni prilagođeni su sistem i metod izlaganja. U težnji da olakšaju rad studentima/cama u svladavanju gradiva, kao i pripremanje ispita, autori/ca su nastojali da na jednostavan i pristupačan, ali istovremeno i suvremen način izlože karakteristike, elemente i obilježja osnovnih i pojedinih općih instituta krivičnog prava, a to su krivično djelo, krivnja, saučesništvo i krivične sankcije.

Osnovne pojmove i institute krivičnog prava opći dio autori/ca su izložili na bazi pozitivnopravnih rješenja koja su sa brojnim novelama sadržana u Krivičnom zakonu Bosne i Hercegovine, Krivičnom zakonu Federacije Bosne i Hercegovine, Krivičnom zakoniku Republike Srpske i Krivičnom zakonu Brčko Distrikta Bosne i Hercegovine. Tekst je potkrijepljen brojnim teorijskim shvatanjima domaće, ali i inozemne krivičnopravne teorije, sudske prakse, kao i komparativnim rješenjima suvremenih krivičnih zakona ili zakonika, naročito onih koji su doneseni u posljednje vrijeme, čime je podignut nivo aktuelnosti, ali i ozbiljnog naučnog promišljanja.

Tekst je zadržao tradicionalnu strukturu udžbeničke literature iz oblasti krivičnog prava, tj. podjelu na opći i posebni dio. Tako je struktuiran da omogućava njegovo korištenje i od strane drugih osoba koje se u procesu školovanja ili stručnog usavršavanja, kao i svakodnevnog rada susreću sa materijom krivičnog prava.

Udžbenik je obima 613 stranica formata B5, uz 781 izvor literature i 1156 fusnota. Struktura udžbenika prati opći dio pozitivnog krivičnog zakonodavstva u Bosni i Hercegovini. Izlaganja u ovoj knjizi sadržajno obuhvataju problematiku Krivičnog prava opći dio. Sistematizirana su u pet dijelova, kao osnovne systemske jedinice. Dijelovi su dalje sistematizirani na glave, poglavlja i tačke, kao niže systemske jedinice.

Prvi dio "Uvod u krivično pravo" obuhvata materiju koja se odnosi na pojmovno određenje krivičnog prava kao grane pozitivnog prava i njegov odnos prema drugim granama prava u pravnom sistemu, zatim na pojmovno određenje nauke krivičnog prava i njen odnos prema drugim naukama koje se prema svom predmetu izučavanja bave kriminalitetom, te materija koja se odnosi na nastanak i razvoj krivičnog prava i nauke krivičnog prava u različitim periodima društvenog razvoja. Zatim slijedi materija koja se odnosi na krivično zakonodavstvo, polazeći od zakona kao glavnog neposrednog izvora krivičnog prava, preko njegovih funkcija, sistema, strukture, tumačenja, do njegovog vremenskog i prostornog važenja. Drugi dio "Krivično djelo" obuhvata problematiku krivičnog djela, polazeći od njegovog pojma i elemenata, preko mjesta i vremena njegovog učinjenja, stadija njegovog ostvarenja, sticaja, njegovih vrsta, do osnova koji isključuju njegovo postojanje. Treći dio "Krivnja" odnosi se na problematiku krivične odgovornosti i krivnje, polazeći od pitanja uračunljivosti, neuračunljivosti, bitno smanjene uračunljivosti i samoskrivljene neuračunljivosti, preko krivnje u užem smislu i njenih oblika, do zabuda i njihovog značaja u krivičnom pravu. Četvrti dio

”Saučesništvo” odnosi se na problematiku saučesništva koja je već odavno poseban predmet obrade u nauci krivičnog prava. Obrada navedene materije zahtijevala je da se, prije svega, odredi pojam saučesništva, a zatim i njegovi oblici i pravna priroda, a potom i krivnja i kažnjivost saučesnika. Peti dio ”Krivične sankcije” odnosi se na problematiku krivičnih sankcija. Obrada navedene materije zahtijevala je, prije svega, predstavljanje sistema krivičnih sankcija, polazeći od pojma i vrste svih krivičnih sankcija do odmjeravanja kazne. Poseban napor autori/ca su uložili u obradu krivičnih sankcija za maloljetnike i mlađe punoljetne osobe. Naime, navedena materija odavno je poseban predmet izučavanja nauke i struke, te zbog toga i brojnih monografija, ali su autori/ca učinili poduhvat vrijedan hvale i učinili ga sastavnim dijelom ovog udžbenika. Navedeno poglavlje, ali i udžbenik, završava obradom materije koja se odnosi na gašenje krivične sankcije, rehabilitaciju i brisanje osude.

Pri obradi navedene, vrlo opsežne i kompleksne materije Krivičnog prava opći dio, autori/ca su na iscrpan, ali za studente/ice ipak prihvatljiv način, obradili čitav niz složenih pitanja, kako sa teorijskog, tako i sa praktičnog aspekta, na bazi rješenja koja postoje u našem pozitivnom krivičnom zakonodavstvu. U cilju boljeg razumijevanja vrlo složene materije, svaki institut prati veliki broj oglednih predmeta iz sudske prakse Bosne i Hercegovine, Hrvatske i Srbije, kao i Europskog suda za ljudska prava. Također, autori/ca su kod velikog broja instituta ukazali i na drugačija zakonska rješenja koja postoje u suvremenom krivičnom zakonodavstvu, a posebno u važećem zakonodavstvu država iz najbližeg okruženja, koja su rezultat drugačijeg teorijskog pristupa. Riječ je o složenom i vrlo opsežnom području istraživanja koje je od naročitog značaja za nacionalnu, regionalnu ali i univerzalnu, opću društvenu zajednicu. Autori/ca pišu pristupačnim jezikom koji složenu pravnu terminologiju čini jasnom i razumljivom široj publici.

Knjiga pod naslovom Krivično pravo opći dio kandidatkinje dr. Amile Ferhatović u koautorstvu sa Borislavom Petrovićem i Draganom Jovaševićem predstavlja originalno naučno djelo, jer obrađuje cjelokupnu materiju krivičnog zakona – opći dio. Stoga je i preporučena kao univerzitetski udžbenik za studente prvog, drugog i trećeg ciklusa studija prava. Također, može biti od iznimne koristi i sucima, tužiteljima, advokatima i policijskim istražiteljima.

2. Krivično pravo posebni dio, Univerzitet u Sarajevu – Pravni fakultet, Sarajevo, 2024. (u koautorstvu sa Borislavom Petrovićem i Draganom Jovaševićem), ISBN 978-9926-544-10-02, CIP zapis dostupan u COBISS sistemu Nacionalne i univerzitetske biblioteke BiH pod ID brojem 62410758

Predmetni univerzitetski udžbenik je pisan sa namjerom da posluži studentima/cama pravnih fakulteta u Bosni i Hercegovini kao osnovni udžbenik za izučavanje materije Krivičnog prava posebni dio, odnosno pojedinih poglavlja (grupa krivičnih djela) iz Posebnog dijela krivičnog prava. Toj osnovnoj namjeni prilagođeni su sistem i metod izlaganja. U težnji da olakšaju rad studentima/cama u svladavanju gradiva kao i pripremanje ispita, autori/ca su nastojali da na jednostavan i pristupačan, ali istovremeno i suvremen način izlože pojedina, najznačajnija krivična djela u osnovnom, privilegiranom ili kvalificiranim oblicima ispoljavanja.

Tematiku posebnog dijela krivičnog prava autori/ca su izložili na bazi pozitivnopravnih rješenja koja su sa brojnim novelama sadržana u Krivičnom zakonu Bosne i Hercegovine, Krivičnom zakonu Federacije Bosne i Hercegovine, Krivičnom zakoniku Republike Srpske i Krivičnom

zakonu Brčko Distrikta Bosne i Hercegovine. Tekst je potkrijepljen brojnim teorijskim shvatanjima domaće, ali i inozemne krivičnopravne teorije, sudske prakse, kao i komparativnim rješenjima suvremenih krivičnih zakona ili zakonika, naročito onih koji su donijeti u posljednje vrijeme, čime je podignut nivo aktuelnosti ali i ozbiljnog naučnog promišljanja.

Tekst je zadržao tradicionalnu strukturu udžbeničke literature iz oblasti krivičnog prava, tj. podjelu na opći i posebni dio. Tako je struktuiran da, pored studenata/ica, omogućava njegovo korištenje i od strane drugih osoba koje se u procesu školovanja ili stručnog usavršavanja, kao i svakodnevnog rada susreću sa izloženom materijom krivičnog prava.

Knjiga je obima 209 stranica formata B5, sa 216 izvora literature i 115 fusnota. Struktura udžbenika prati posebni dio krivičnog zakona, tj. pojedina krivična djela svrstana u odgovarajuće Glave. Autori/ca su se opredijelili za određen broj krivičnih djela koja su tipična za univerzitetsku nastavu iz krivičnog prava. Izabrana su krivična djela iz sva četiri krivična zakona koji su na snazi, odnosno u primjeni u Bosni i Hercegovini. Tako su iz Krivičnog zakona Bosne i Hercegovine obrađena 24 krivična djela koja su svrstana u sljedeće Glave: Krivična djela protiv integriteta Bosne i Hercegovine, Krivična djela protiv privrede i jedinstva tržišta te krivična djela iz oblasti carina, Krivična djela korupcije i krivična djela protiv službene i druge odgovorne dužnosti, Krivična djela protiv pravosuđa, Krivična djela protiv autorskih prava i Krivična djela dogovor, pripremanje, udruživanje i organizovani kriminal. Iz krivičnih zakona Federacije BiH, Republike Srpske i Brčko distrikta BiH autori su odabrali i obradili 55 krivičnih djela svrstanih u sljedeće Glave: Krivična djela protiv života i tijela, Krivična djela protiv slobode i prava građana, Krivična djela protiv spolne slobode i morala, Krivična djela protiv braka, porodice i mladeži, Krivična djela protiv zdravlja ljudi, Krivična djela protiv radnih odnosa, Krivična djela protiv imovine, Krivična djela protiv okoliša, poljoprivrede i prirodnih dobara, Krivična djela protiv opće sigurnosti ljudi i imovine, Krivična djela protiv sigurnosti javnog prometa, Krivična djela protiv javnog reda i pravnog prometa i Krivična djela protiv sistema elektronske obrade podataka.

Pisanje ovakvog naučnog djela je zahtjevan posao i uobičajeno je da u njemu sudjeluje više nastavnika krivičnog prava. I ne samo to. Zbog raznovrsnosti i obimnosti materije pribjegava se pisanju ovakve knjige iz više dijelova. U ovom slučaju koautori/ca su se odlučili da ponude jednu knjigu u kojoj su odabrali i obradili krivična djela koja se najčešće čine, te tako studentima omogućili izučavanje velikog broja krivičnih djela, što je uobičajeno na pravnom studiju. Obzirom da su neka krivična djela propisana u sva četiri zakona, autori su to naznačili u naslovu svake methodske jedinice što je veoma praktično za studente, ali i za pravnike praktičare. Najzad, treba reći da su se autori/ca pridržavali temeljnih principa krivičnopravne nauke, pa su kod svakog krivičnog djela izvršili analizu njegovih općih elemenata.

Knjiga pod naslovom Krivično pravo posebni dio kandidatkinje dr. Amile Ferhatović u koautorstvu sa Borislavom Petrovićem i Draganom Jovaševićem predstavlja originalno naučno djelo, jer obrađuje uobičajeni veliki dio materije posebnog dijela krivičnog zakona. Stoga je preporučena kao univerzitetski udžbenik za studente prvog, drugog i trećeg ciklusa studija prava. Također, može biti od iznimne koristi i sucima, tužiteljima, advokatima i policijskim istražiteljima prilikom obavljanja redovnih poslova na otkrivanju, istraživanju i dokazivanju, kao i presuđenju krivičnih djela.

Zaključak II

Kandidatkinja je objavila dvije knjige, te ispunjava uvjet vezan za minimalno dvije objavljene knjige.

5.2.2. Naučni radovi

Kandidatkinja je dostavila trinaest (13) objavljenih radova koji će u nastavku biti predmetom ocjene od strane Komisije.

1. **Facts and doubts on the beginning of human life – scientific, legal, philosophical and religious controversies.** *Journal of Perinatal Medicine*, 2023, vol. 51, no. 1, p. 39-50, u koautorstvu sa Kurjak, A., Stanojević, M., Barišić, P., Gajović, S. & Hrabar, D. (pregledni naučni rad)

Rad je rezultat zajedničkog istraživanja nekoliko vrhunskih stručnjaka iz različitih oblasti nauke, a sa ciljem da pregledaju relevantnu literaturu, predstavljaju činjenice i dvojbe o početku ljudskog života i pronađu inovativne ideje.

U posljednjih 40 godina nije objavljeno mnogo radova o početku ljudskog života. U svjetlu vrlo značajnog napretka perinatalne medicine, iznenađujuće je da je ova vruća tema još uvijek vrlo kontroverzna, kako je to istaknuto u radovima objavljenim od 1980-ih do nedavno od strane zagrebačkih i inozemnih istraživača.

Vrlo je komplicirano dati tačan odgovor na pitanje "Kako definirati ljudski život?" Autori/ce su se zapitali mogu li kao naučnici, na temelju svojih znanja o procesu oplodnje, zakonodavcima dati jasnu definiciju početka života. Današnje dileme o poštivanju ljudskog života od rođenja do smrti uključuju ne samo biologiju, već i druge nauke poput filozofije, teologije, sociologije, psihologije, prava i politike. Navedene nauke ocjenjuju temu s različitih gledišta. Integracija svih ovih perspektiva mogla bi rezultirati ispravnom definicijom. Glavna svrha ovog rada je pokušati odrediti kada ljudska jedinka počinje. Kako se to pokazalo preteškim, autori/ce su se morali zadovoljiti određenom fazom u reproduktivnom procesu prije koje bi bilo nemoguće s bilo kakvom uvjerljivošću reći da ljudska jedinka postoji. Autori/ce su stali na stav da je potrebno vratiti moralnu dimenziju promatranja u znanost o životu. Poanta je pomiriti univerzalna etička načela o apsolutnoj vrijednosti života sa svakodnevnim izazovima i dilemama. Njihovo je najdublje uvjerenje da život ima apsolutnu vrijednost i da u životu uvijek ostaje nešto neuništivo i supstancijalno, što se ne može nečim konačnim vrednovati, niti potpuno svesti na materijalni biološki ekvivalent i genetski supstrat.

Rad je od strane recenzenata ocijenjen kao pregledni naučni rad obzirom da daje cjelovit pregled problema/područja istraživanja na osnovu već objavljenih rezultata, ali sadrži i originalne analize, sinteze ili prijedloge za daljnja istraživanja.

2. Paramilitary and war crimes committed in Bosnia and Herzegovina / Paravojne jedinice i ratni zločini počinjeni u Bosni i Hercegovini. Pregled: časopis za društvena pitanja / Periodical for Social Issues, 2023, 64 (1), p. 3–17, u koautorstvu sa Šimić, G. (izvorni naučni rad)

Posljednji oružani sukob u Bosni i Hercegovini, koji se vodio između 1992. i 1995. godine, bio je krvav. Ne samo da je proliveno mnogo prave krvi, nego je, metaforički rečeno, rezultiralo milijunima raseljenih osoba, stotinama masovnih grobnica, stotinama mjesta zatočenja, stotinama hiljada ratnih zarobljenika, stotinama hiljada mučenih i uništenih života. U poslijeratnom periodu je procesuirano oko 700 slučajeva ratnih zločina koji se protežu na oko hiljadu optuženih, a uključuju sve moguće ratne zločine, uključujući i genocid. Ova suđenja za ratne zločine mogla su se promatrati iz različitih perspektiva. Dok su većinu ovih zločina počinili vojnici i policajci, među onima koji nisu bili vojnici ili policajci posebno treba istaknuti jednu kategoriju, paravojku. Pripadnici paravojnih postrojbi, a ne vojnici ili civili, prema bazi podataka o ratnim zločinima, optuženi su u oko 5% svih slučajeva ratnih zločina. Ali onda, ako te osobe nisu vojnici ili civili, postavlja se pitanje ko su oni bili i zašto čine to što su činili? Nadalje, kakav im je bio interes ponašati se na način koji je okarakteriziran kao zločinački, tačnije ratni zločin.

U nizu ratnih zločina koje su počinile paravojne skupine u Bosni i Hercegovini, u ovom radu su analizirani oni koji uključuju najteže i one od najvećeg značaja. Time je ovaj rad pridonio boljem razumijevanju položaja i ponašanja paravojnih skupina uključenih u počinjenje ratnih zločina, daljnjem zakonskom reguliranju njihova položaja, te društvenom razumijevanju prirode paravojnih snaga u i nakon oružanog sukoba.

Rad je od strane recenzenata ocijenjen kao izvorni naučni rad koji sadrži neobjavljene i nove rezultate originalnih istraživanja u potpunom obliku, daje značajan doprinos određenoj naučnoj problematici ili njenom razumijevanju i opisuje nove rezultate istraživanja iz navedene oblasti.

3. Razvoj i perspektiva Medicinskog krivičnog prava u Bosni i Hercegovini. Godišnjak Pravnog fakulteta u Sarajevu, LXV, 2023., str. 45-72, u koautorstvu sa Pruščanović K. (izvorni naučni rad)

Liječnička djelatnost dijelom je zdravstvene djelatnosti, koja je, obzirom na svoju usmjerenost na zaštitu zdravlja pojedinca, porodice i cjelokupnog stanovništva, pozicionirana kao djelatnost od naročitog društvenog interesa. Pravna regulativa ove oblasti sadržana je u okviru relativno novije pravne grane medicinskog prava, čijoj sve većoj društvenoj aktualizaciji svjedočimo upravo u XXI stoljeću. Prateći razvoj medicine, medicinsko pravo se kontinuirano razvija i usavršava, susrećući se sa brojnim izazovima, te kao svoj neizostavan segment i subdisciplinu etablira i medicinsko krivično pravo. Slijedom uloge krivičnog prava u zaštiti najznačajnijih društvenih dobara i vrijednosti, medicinsko krivično pravo, zbog neprikosnovenog značaja zdravlja kao pravnog dobra, kao *ultima ratio* pravnog poretka štiti zdravlje pojedinca, ali i javno zdravlje, obuhvatajući širok dijapazon delikatnih pravnih pitanja koja uključuju liječnika, kao osnovnog, samostalnog i odgovornog nosioca zdravstvene djelatnosti, s jedne strane, te pacijente s druge strane.

Fokus medicinskog krivičnog prava globalno čine brojne teme, kao što su krivnja liječnika općenito, informirani pristanak, odnosno krivnja za samovoljno liječenje, inkriminacije nesavjesnog liječenja i nepružanja medicinske pomoći, liječnička tajna i krivnja za kršenje liječničke tajne, krivično djelo čedomorstva, pobačaj i pravni problemi pobačaja, pravni aspekti intenzivne medicine, presađivanje dijelova ljudskog tijela, odnosno krivnja za nedozvoljeno presađivanje dijelova ljudskog tijela, nedozvoljenu trgovinu organima i transfuziju krvi, krivična djela prenošenja spolne i zarazne bolesti, osobe s duševnim smetnjama, odnosno pitanja neuračunljivosti i smanjene uračunljivosti, isključenja krivnje, mjera sigurnosti obaveznog psihijatrijskog liječenja, posebnih prava osoba s duševnim smetnjama, te odnos krivičnog prava i ovisnosti, kroz brojne segmente među kojima se naročito ističe zloupotreba opojnih droga, mjera sigurnosti obaveznog liječenja od ovisnosti, te legalizacija i dekriminalizacija lakih droga.

Slijedom navedenog, autorice su se u radu osvrnule na razvoj i perspektivu medicinskog krivičnog prava konkretno u Bosni i Hercegovini, te ukazale na pojedina naročito prijemna pitanja u teoriji, zakonodavstvu, ali i u sudskoj praksi Bosne i Hercegovine.

Rad pod istim nazivom je prvi put prezentiran u okviru sesije „Odgovornost u medicini” na II Kongresu Ljekarske/Liječničke komore FBiH sa međunarodnim učešćem na temu „Medicinsko pravo”, održanom od 11.11. do 13.11.2022. godine na Medicinskom fakultetu Univerziteta u Tuzli. Predmetni rad nije publiciran niti korišten od strane Ljekarske/Liječničke komore FBiH, zbog čega su autorice zadržale sva autorska prava na objavu kompletnog rada. Ljekarska/Liječnička komora FBiH zadržala je pravo da objavi sažetak predmetnog rada u Zborniku sažetaka II Kongresa Ljekarske/Liječničke komore FBiH sa međunarodnim učešćem na temu „Medicinsko pravo”.

Rad je od strane recenzenata ocijenjen kao izvorni naučni koji sadrži neobjavljene i nove rezultate originalnih istraživanja u potpunom obliku, daje značajan doprinos određenoj naučnoj problematici ili njenom razumijevanju i opisuje nove rezultate istraživanja iz navedene oblasti.

4. The Unborn and Its Rights. *Science, Art and Religion*, 2022, Volume 1, Issue 2-4, p. 237-242, u koautorstvu sa Degen, S. & Kurjak, A. (pregledni naučni rad)

Brojne su kontroverze o pravnom statusu nerođenog čeda. O tome imaju šta reći mnoge ljudske djelatnosti poput nauke, etike, morala, prava, povijesti i sociologije. Sve te važne djelatnosti imaju i uvijek će imati različite poglede na početak ljudskog života. Polemike započinju s nedovršenim raspravama kada počinje ljudski život. Još je manje pojašnjeno pravno pitanje kada počinju prava fetusa i koja prava treba dati nerođenom čedu. Teško je, gotovo nemoguće, sistematizirati podatke iz literature jer su oni ili nastali u različitim društvenim sistemima ili nedovoljno precizno definiraju ono što suvremene medicinske spoznaje znaju o nerođenom djetetu. Zato je ovo područje jedno od najkontroverznijih područja u suvremenoj bioetici. Svi se međutim slažu da treba poštovati svetost života i da treba život zaštititi od njegovog početka, ali da on može ponekad imati sekundarnu važnost kada se ocijeni da postoje medicinski razlozi za prekid trudnoće.

Predmetni rad bavi se pitanjima prava fetusa, otvarajući nekoliko područja na koja ni pravo ni deontologija nisu dali jasne odgovore: pravo na kvalitet života, pravo na smrt, pravo biti rođen i željen, pravo na odgovarajuću medicinsku njegu.

Rad je ocijenjen kao pregledni naučni rad koji sadrži cjelovit prikaz stanja određenog područja teorije i njene primjene, dok autori/ca donose vlastiti kritički osvrt i ocjenu, te obvezno navodi podatke o svim objavljenim radovima koje su koristili kao polazište za svoj rad.

5. Pravni položaj liječnika u svjetlu medicinskog prava. Godišnjak Pravnog fakulteta u Sarajevu, LXV, 2022., str. 31–62, u koautorstvu sa Pruščanović, K. (izvorni naučni rad)

Liječnička djelatnost pravno je regulirana medicinskim pravom, kao relativno novijom pravnom disciplinom, koja vremenom, u skladu sa tokovima razvoja društva i nauke, sve više dobiva na značaju. Tim slijedom svjedočimo fenomenu juridizacije medicine, ali i sve većoj potrebi za multidisciplinarnim promatranjem brojnih delikatnih pitanja kroz prizmu medicine, pravne nauke i prakse, etike, pa čak i integrativne bioetike. Pravna odgovornost liječnika, predstavljajući doktrinarno, ali i praktično značajno pitanje, koncipirana je kao višestruka deliktna odgovornost, među kojima je i krivična odgovornost, kao najteži vid pravne odgovornosti liječnika. Tako je i medicinsko krivično pravo neizostavan dio medicinskog prava, gdje krivično pravo kao *ultima ratio* pravnog poretka štiti zdravlje pojedinca i javno zdravlje, obuhvatajući širok dijapazon delikatnih pravnih pitanja koja uključuju liječnika, kao osnovnog, samostalnog i odgovornog nosioca zdravstvene djelatnosti, s jedne strane, te pacijente s druge strane, primjerom kojih su pitanja krivnje liječnika općenito, informiranog pristanka, odnosno krivnje za samovoljno liječenje, inkriminacije nesavjesnog liječenja i nepružanja medicinske pomoći, institut liječničke tajne i krivnja za kršenje liječničke tajne, pravni aspekti intenzivne medicine, ali i brojna druga.

U tom smislu, u domenu medicinskog prava općenito, kao i medicinskog krivičnog prava, naročitu pažnju zavrijeđuje pravni položaj liječnika. Razmatrajući generalno pravni okvir medicinskog prava, autorice su u predmetnom radu nastojale predstaviti i analizirati pravni položaj liječnika u svjetlu važećih propisa u Federaciji Bosne i Hercegovine. Iako čini samo jedan segment medicinskog, pa i medicinskog krivičnog prava, uporedo sa razvojem medicine i svojevrsnom masovnošću zdravstvenih usluga koje se kontinuirano pružaju, pitanje pravnog položaja liječnika i odgovornosti koje iz tog položaja proizilaze, izdiferenciralo se kao izuzetno prijedorno pitanje i u teoriji, i u praksi.

Rad je od strane recenzenata ocijenjen kao izvorni naučni rad koji sadrži neobjavljene i nove rezultate originalnih istraživanja u potpunom obliku, daje značajan doprinos određenoj naučnoj problematici ili njenom razumijevanju i opisuje nove rezultate istraživanja iz navedene oblasti.

6. Razvoj krivičnopravne naučne oblasti na Pravnom fakultetu Univerziteta u Sarajevu. *Godišnjak Pravnog fakulteta u Sarajevu, LXIV, 2021, str. 181-215, u koautorstvu sa Petrović, B. (pregledni naučni rad)*

Krivičnopravna naučna oblast razvijala se i razvija zahvaljujući naučnim doprinosima pojedinih profesora Krivičnog prava koji su djelovali u okviru ove naučne oblasti u različitim vremenskim periodima na Katedri krivičnog prava. Njen razvoj na Pravnom fakultetu Univerziteta u Sarajevu započeo je prije 75 godina, kada je 1946. godine Fakultet osnovan i upisana prva generacija studenata.

Autor/ica u svom radu istražuju historijski razvoj krivičnopravne naučne oblasti od osnivanja Pravnog fakulteta Univerziteta u Sarajevu do danas, analizirajući nastavne djelatnosti, predstavljajući njihove nositelje, kao i razvoj krivičnopravne naučne misli kroz teoriju. Također istražuju i predstavljaju i podoblasti u okviru naučne oblasti krivičnog prava kojima su se pojedini profesori bavili u svom naučnoistraživačkom radu, ali i kroz mentorski rad prijavljenih i odbranih doktorskih disertacija. Na kraju priloga autor/ica zaključuju da je razvoj krivičnopravne naučne oblasti na Pravnom fakultetu Univerziteta u Sarajevu doprinio razvoju brojnih nastavnih predmeta, obaveznih i izbornih, ali imao i značajan utjecaj na sudsku praksu u oblasti krivičnog prava, obrazujući, između ostalih, nositelje pravosudnih funkcija, te na taj način pružio značajan doprinos vladavini prava u Bosni i Hercegovini.

Rad je od strane recenzenata ocijenjen kao pregledni naučni rad koji sadrži originalan, kritički i sažet prikaz jednog područja teorije i praktičnih istraživanja, u kojima autori sami aktivno kritički sudjeluju, a u kojem je naglašena uloga njihovog originalnog doprinosa tom području.

7. Krivičnopravne posljedice pandemije COVID-19 u Bosni i Hercegovini. *Godišnjak Pravnog fakulteta u Sarajevu, LXIV, 2021, str. 31-64, u koautorstvu sa Pruščanović, K. (izvorni naučni rad)*

Pandemija COVID-19 uzrokovala je društveno-ekonomski poremećaj na svjetskom nivou. Posljedice pandemije su i u Bosni i Hercegovini brojne i primjetne u svim sferama života i društva: pravne, ekonomske, psihološke itd. Predmet ovog rada su krivičnopravne posljedice pandemije. Autorice su ih analizirale i predstavile kroz četiri segmenta: utjecaj pandemije na krivično pravosuđe, utjecaj pandemije na obim i strukturu krivičnih djela protiv zdravlja ljudi, utjecaj pandemije na tzv. "pandemiju korupcije" i utjecaj pandemije na slučajeve nasilja u porodici u Bosni i Hercegovini. Krivičnopravnim posljedicama pandemije, pored utjecaja pandemije na rad krivičnog pravosuđa i zakonodavnih aktivnosti na uvođenju instituta online suđenja, možemo smatrati i izmjene u fenomenologiji kriminaliteta, u pogledu strukture i obima krivičnih djela koja se čine, a do kojih je došlo upravo djelovanjem pandemije COVID-19 i promijenjenih društvenih uslova. Navedeno može biti promatrano na makroplanu, govoreći o svijetu globalno, ali i na mikroplanu pojedinih država. Slijedom navedenog, autori su svoju pažnju u predmetnom radu usmjerili na krivičnopravne posljedice pandemije u Bosni i Hercegovini, prvenstveno iz ugla reorganiziranja krivičnog pravosuđa sa svrhom omogućavanja kontinuiteta u radu krivičnog pravosuđa u vanrednim uslovima i normativnu djelatnost u tom pogledu.

S druge strane, osvrt na fenomenologiju kriminaliteta u Bosni i Hercegovini tokom trajanja pandemije predstavile su promatranjem krivičnih djela protiv zdravlja ljudi tokom pandemije (u prvom redu krivičnih djela prenošenje zarazne bolesti, nepostupanje po zdravstvenim propisima za vrijeme epidemije, te neprimjenjivanje mjera za zaštitu od zarazne bolesti odnosno zapošljavanje osoba oboljelih od zarazne bolesti), kao i preispitivanjem teze o "pandemiji korupcije" u Bosni i Hercegovini tokom pandemije COVID-19 i eventualnom porastu slučajeva nasilja nad ženama i nasilja u porodici kao tzv. "pandemije iz sjene".

Rad je od strane recenzenata ocijenjen kao izvorni naučni rad koji sadrži neobjavljene i nove rezultate originalnih istraživanja u potpunom obliku, daje značajan doprinos određenoj naučnoj problematici ili njenom razumijevanju i opisuje nove rezultate istraživanja iz navedene oblasti.

- 8. Medical Law in Bosnia and Herzegovina.** U: *Medical Ethics and Legal Aspects of Medical Practice*, Sarajevo, 2021, University Sarajevo School of Science and Technology, p. 161-203, u koautorstvu sa Jusufović, S., Godinjak, A., Prohić, N. & Čatić, T., Jusufović, R. (ed.), – poglavlje u knjizi (**izvorni naučni rad**).

U univerzitetskom udžbeniku pod naslovom „Medicinska etika i pravni aspekti liječničke prakse“ kandidatkinja je objavila jedno poglavlje pod naslovom „Medicinsko pravo u Bosni i Hercegovini“. Navedeno poglavlje u knjizi sadržajno obuhvata šest podpoglavlja, i to: 1.) Pojam, izvori i značenje medicinskog prava, 2.) Odnos liječnika i pacijenta (pravni aspekt), 3.) Pristanak pacijenta na medicinske intervencije i obavijesti, 4.) Pravni aspekti intenzivne medicine – eutanazija, potpomognuto samoubistvo, sudjelovanje u samoubistvu, pomoć umirućoj osobi i 5.) Liječnička greška.

Pravo, kao predstavnik društvenih nauka, i medicina, iz sfere bioloških nauka, imaju mnogo dodirnih tačaka. Dvije najistaknutije tačke su: sudska (pravna ili forenzička) medicina i medicinsko pravo. Kada govorimo o sudskoj medicini (koja obuhvata sudsku medicinu i sudsku psihijatriju ili psihopatologiju), govorimo o medicini u pravu, a kada govorimo o medicinskom pravu, mislimo na pravo u medicini. Sudska medicina je zasebna grana medicine i ima zadaću pružanja pomoći pravnoj struci pri raznim medicinskim problemima (utvrđivanje vremena i uzroka smrti, tjelesnih ozljeda, itd.) koje je potrebno rješavati u sudskom postupku. Za razliku od sudske medicine, Medicinsko pravo je posebna grana prava koja se odnosi na liječničku profesiju. Iako su je neki suvremeni pravni sustavi počeli razvijati još u 19. stoljeću, na našim prostorima, ova nauka je relativno mlada jer je tek u svojim početnim fazama. Medicinsko pravo je šire od liječničkog prava, ali medicinsko pravo istovremeno čini značajan dio zdravstvenog prava. Medicinsko pravo je sastavljeno od skupa pravnih pravila koja reguliraju medicinsku djelatnost, utvrđuju obilježja pojedinaca koji obavljaju te djelatnosti, te određuju njihov odnos s korisnicima usluga. Osim toga, medicinsko pravo u širem smislu obuhvata pravne norme koje se odnose na lijekove, medicinska sredstva, sakupljanje i transfuziju krvi. Kao i svaka posebna naučna disciplina, medicinsko pravo ima svoje izvore (ustav, zakon, podzakonski akti) kojima se uređuje ponuda medicinskih službi.

Medicinsko pravo, kao grana prava, se proučava na brojnim medicinskim i pravnim fakultetima u suvremenim zemljama (SAD, Njemačka, Italija...), advokati su specijalizirani za slučajeve iz

područja medicinskog prava. U proteklom desetljeću sve veća edukacija i rad u ovoj oblasti pokazali su da se ova grana prava razvija iznimnom brzinom i u Bosni i Hercegovini, Hrvatskoj i Srbiji. U navedenim državama u studijske programe uvedeno je Medicinsko pravo kao obavezni ili izborni predmet, ali i zasebni specijalistički ili magistarski studij, što jasno pokazuje da je Medicinsko pravo danas u porastu.

Iz navedenih razloga, nastao je predmetni univerzitetski udžbenik, kao obavezna literatura studentima na drugoj godini studija medicine na University Sarajevo School of Science and Technology. Svrha knjige je pomoći studentima da razviju moralnu izvrsnost i nauče važnost uravnoteženog pristupa kada se suočavaju s pacijentima, krhkim ljudskim bićima koja traže pomoć kada su bolesni. U okviru izučavanja navedenog predmeta, tačnije, približavanja studenata moralnim normama i etičkim standardima, nezaobilazno je bilo i poglavlje koje je kandidatkinja priredila za studente medicine a koje im nudi osnovna znanja iz medicinskog prava i najistaknutije dodirne tačke navedene dvije naučne oblasti.

Iako je predmetna univerzitetska knjiga podvrgnuta dvjema recenzijama, Komisija je navedeno poglavlje kandidatkinje u knjizi cijenila kao izvorni naučni rad koji sadrži neobjavljene i nove rezultate originalnih istraživanja u potpunom obliku, daje značajan doprinos određenoj naučnoj problematici ili njenom razumijevanju i opisuje nove rezultate istraživanja iz navedene oblasti.

9. Govor mržnje u praksi sudova Bosne i Hercegovine. U: A. Murtezić (ured.). *Izabrani segmenti iz oblasti ljudskih prava* (str. 141-159). Sarajevo, 2021, JU Centar za edukaciju sudija i tužilaca F BiH, str. 141-159 (**stručni rad**)

Pravo na slobodu izražavanja kao jedno od temeljnih ljudskih prava, važno za svakog pojedinca i za svaku demokratsku državu, uživa zaštitu u svim glavnim sistemima ljudskih prava i u nacionalnim ustavima. Jedan od vidova zloupotrebe ove slobode jeste govor mržnje. Dakle, imajući u vidu da to pravo nije apsolutno, neophodno je odrediti njegove granice, posebno obzirom na govor mržnje. Gdje prestaju granice slobode izražavanja a počinje govor mržnje nije lako odrediti.

To je vrlo aktualna tematika posljednjih godina i u Bosni i Hercegovini. Razlog tome su, s jedne strane, česte izjave koje javnost percipira kao potencijalni govor mržnje, a s druge strane, neznatan broj krivičnih postupaka. Kriminalizacija govora mržnje u Bosni i Hercegovini ogleda se kroz krivična djela izazivanja mržnje propisana u krivičnom zakonodavstvu Bosne i Hercegovine. Imajući u vidu navedenu zakonsku regulativu, iako ne postoji jedinstvena odredba koja na jednom mjestu uređuje sve oblike govora mržnje, govor mržnje u zakonodavstvu Bosne i Hercegovine nije podnormirana materija. Naprotiv, upravo suprotno, obzirom na ustavno ustrojstvo Bosne i Hercegovine govor mržnje je uređen nizom propisa, konkretnije četiri krivična zakona u Bosni i Hercegovini, što, u slučaju razlika, može predstavljati izvor problema. Obzirom da se radi o specifičnim krivičnim djelima, u čijem opisu su pojmovi (elementi) alternativno postavljeni, potrebno ih je jasno razgraničiti kako u odnosu na radnju, način, objekat ili sredstvo učinjenja, tako i u odnosu na mogućnost nastanka posljedice.

Na temelju pregleda i analize sudske prakse u Bosni i Hercegovini, pored toga što je cilj bio utvrditi koliko često se ta djela pojavljuju u praksi, koji je odnos osuđujućih u odnosu na oslobađajuće presude, vrsta i visina izrečenih krivičnih sankcija za navedena djela i sl., cilj je bio i utvrditi da li su u presudama zauzeta određena stajališta u odnosu na pojedina sporna pitanja, odnosno kako naša sudska praksa prihvata i tumači pojedina obilježja tog krivičnog djela (na primjer, radnja učinjenja, pojam javnosti, izazivanje ili raspirivanje mržnje, razdora i/li netrpeljivosti, modaliteti načina učinjenja djela, subjektivnu stranu djela i sl.).

Pregledom i analizom pravosnažnih presuda za sva krivična djela izazivanja mržnje donesenih na području cijele Bosne i Hercegovine u periodu od 2004. do aprila 2019. godine, utvrđeno je da se sudska praksa u odnosu na ova krivična djela odnosi samo na krivično djelo izazivanja nacionalne, rasne i vjerske mržnje, razdora i netrpeljivosti u svim krivičnim zakonima u Bosni i Hercegovini, dok sudska praksa za preostala krivična djela izazivanja mržnje u Bosni i Hercegovini do sada ne postoji. Obzirom da je djelo izazivanje nacionalne, rasne i vjerske mržnje, razdora i netrpeljivosti uvedeno 2003., odnosno 2005. godine (KZ BiH), to je razdoblje od 16, odnosno 14 godina.

Prema dostavljenim podacima svih sudova u tom razdoblju u Bosni i Hercegovini doneseno je ukupno 27 odluka, od kojih je 16 prvostepenih, 9 drugostepenih, jedna presuda Vrhovnog suda RS-a i jedna Odluka Ustavnog suda BiH.

Obzirom da rad predstavlja dio istraživanja koji je kandidatkinja u koautorstvu sa Trlin Davorom objavila kao pregledni naučni rad (predstavljen pod rednim brojem 12), ali prilagođen potrebama predmetne stručne publikacije, Komisija cijeni navedeni rad kao stručni rad koji sadrži korisne priloge iz određene struke, ali ne predstavlja izvorna istraživanja.

10. Teorijsko razgraničenje saučiniteljstva i saučesništva u užem smislu. *Godišnjak Pravnog fakulteta u Sarajevu, LXIII, 2020, 71-98*, u koautorstvu sa Pruščanović, K. (izvorni naučni rad)

Teorija krivičnog prava se u pogledu kolektivnog kriminala, kao pojma koji označava učešće više osoba u učinjenju krivičnog djela, suočava s poteškoćama u razlikovanju i razgraničenju njegovih pojavnih oblika: saučiniteljstva, podstrekavanja i pomaganja, odnosno u razlikovanju saučiniteljstva i saučesništva u užem smislu. Takve poteškoće su primarno povezane s prirodom djelatnosti koju poduzima svaka od osoba koje učestvuju u učinjenju krivičnog djela. U praksi je veoma teško ustanoviti rigidnu granicu u kontekstu pitanja koja djelatnost može biti okarakterizirana kao saučiniteljska, a koje djelatnosti ipak ostaju u domenu saučesništva u užem smislu, odnosno podstrekavanja i pomaganja, kao i u pogledu varijacija u unutarnjem psihičkom odnosu koji osoba koja učestvuje u učinjenju krivičnog djela ima u odnosu na to krivično djelo.

Dugogodišnjim nastojanjem teorije krivičnog prava da uspostavom određenih kriterija razgraničenja između saučiniteljstva i saučesništva u užem smislu riješi ovo pitanje, dolazi do etabliranja teorija o saučiniteljstvu, pa su se tako izdiferencirale objektivne teorije saučiniteljstva, subjektivne teorije saučiniteljstva i objektivno-subjektivne ili mješovite teorije saučiniteljstva. Navedeno zapravo predstavlja grupe teorija o saučiniteljstvu, razvrstane

prema tome da li u kriterijima za razgraničenje saučiniteljstva i saučesništva u užem smislu primat daju objektivnom elementu, kao djelatnosti koju osoba poduzima, subjektivnom elementu, kao unutarnjem psihičkom odnosu učesnika prema učinjenju krivičnog djela, ili, pak, sublimiraju i objektivne i subjektivne elemente.

Ovaj rad, u tom pogledu, nastoji dati pregled i iscrpnu analizu naučno relevantnih teorija o saučiniteljstvu, ukazujući i na genezu samog teorijskog određenja instituta saučiniteljstva i njegovih temeljnih odrednica.

Rad je od strane recenzenata ocijenjen kao izvorni naučni koji sadrži neobjavljene i nove rezultate originalnih istraživanja u potpunom obliku, daje značajan doprinos određenoj naučnoj problematici ili njenom razumijevanju i opisuje nove rezultate istraživanja iz navedene oblasti.

11. Kućni zatvor sa elektronskim nadzorom. *Godišnjak Pravnog fakulteta u Sarajevu, LXII, 2019, str. 673-708*, u koautorstvu sa Petrović, B & Pruščanović, K. (prethodno naučno saopćenje)

Autor/ice u radu elaboriraju problem kratkih kazni zatvora, razloge zbog kojih je došlo do uvođenja alternativnih sankcija te prikazuju vrste alternativnih sankcija kojima se zamjenjuje kazna zatvora u trajanju do jedne godine u Federaciji Bosne i Hercegovine, kao i njihove karakteristike.

Posebna pažnja u radu posvećena je alternativnoj sankciji kućnog zatvora sa elektronskim nadzorom koja je u krivično zakonodavstvo Federacije Bosne i Hercegovine uvedena 2011. godine. Nakon predstavljanja statističkih podataka o kućnom zatvoru sa elektronskim nadzorom u praksi izvršavanja Federacije Bosne i Hercegovine, u konačnici, autori daju i svoja promišljanja o ovoj alternativnoj sankciji *de lege ferenda*.

Predstavljen je i komparativnopravni aspekt postojanja i primjene ove alternativne sankcije u krivičnom zakonodavstvu Srbije, Hrvatske, Njemačke, Austrije i Švicarske.

Rad je od strane recenzenata ocijenjen kao prethodno naučno saopćenje koje sadrži nove, još neobjavljene rezultate originalnih istraživanja, ali u preliminarnom obliku.

12. Krivičnopravni aspekt govora mržnje kao zloupotrebe prava na slobodu izražavanja. *Pregled, LX, 2019, str. 133-157*, u koautorstvu sa Trlin, D. (pregledni naučni rad)

Autori analiziraju pravo na slobodu izražavanja kao jedno od temeljnih ljudskih prava, važno za svakog pojedinca i za svaku demokratsku državu. Međutim, imajući u vidu da to pravo nije apsolutno, autori nastoje odrediti njegove granice, posebno s obzirom na govor mržnje. To je vrlo aktualna tematika posljednjih godina i u Bosni i Hercegovini. Razlog tome su, s jedne strane, česte izjave koje javnost percipira kao potencijalni govor mržnje, a s druge strane, neznatan broj krivičnih postupaka. Nakon uvodnog pregleda relevantnih međunarodnih izvora autori se fokusiraju na pojmovno određenje govora mržnje. U nastavku rada

analiziraju bosanskohercegovačko zakonodavstvo i sudsku praksu, te pojedine presude Evropskog suda za ljudska prava. Cilj rada je, na temelju analize međunarodnog i domaćeg pravnog okvira te dostupne sudske prakse sudova u Bosni i Hercegovini i Evropskog suda za ljudska prava, jasno upozoriti na aktualna sporna pitanja i ponuditi smjernice za njihovo rješavanje.

Rad je od strane recenzenata ocijenjen kao pregledni naučni rad koji sadrži originalan, kritički i sažet prikaz jednog područja teorije i praktičnih istraživanja, u kojima autori sami aktivno kritički sudjeluju, a u kojem je naglašena uloga njihovog originalnog doprinosa tom području.

13. Die Abgrenzung des Eventualvorsatzes von der bewussten Fahrlässigkeit und die Irrtümer im Strafrecht. In: 13. Türkische Strafrechtstage Ankara, 2018, Universität in Istanbul, Kassationshof, s. 265- 279, (pregledni naučni rad)

U ovom članku autorica je predstavila i analizirala oblike krivnje i zablude propisane u krivičnom zakonodavstvu Bosne i Hercegovine. Shodno tome, u krivičnom pravu Bosne i Hercegovine umišljaj i nehat su dva oblika krivnje, a stvarna i pravna zabluda su dvije vrste zabluda koje su regulirane zakonom. Izlažući navedeno, autorica se fokusirala na najtežu tačku: razliku između eventualnog umišljaja i svjesnog nehata kroz teoriju, ali i kroz istraživanje relevantne sudske prakse Bosne i Hercegovine.

Rad je kandidatkinja predstavila na Kongresu krivičnog prava koji se održavao od 31.5. do 2.6.2018. godine u Ankari, a tek godinu poslije objavljen je u Zborniku radova.

Rad je od strane Komisije ocijenjen kao pregledni naučni rad koji sadrži originalan, kritički i sažet prikaz jednog područja teorije i praktičnih istraživanja, u kojima autorica sama aktivno kritički sudjeluje, a u kojem je naglašena uloga njenog originalnog doprinosa tom području.

Zaključak III

Kandidatkinja ispunjava uvjet vezan za minimalno osam (8) naučnih radova u priznatim publikacijama objavljenih nakon izbora u zvanje vanredne profesorice, od čega je šest (6) ocijenjeno kao izvorni naučni, pet (5) kao pregledni, jedan (1) kao prethodno naučno saopćenje i jedan (1) kao stručni.

6. Originalni stručni uspjeh kao što je projekt, patent ili originalni metod

Kandidatkinja je u svom dosadašnjem angažmanu učestvovala u većem broju naučnoistraživačkih i stručnih projekata, radnih grupa, studija i sl. Nakon izbora u zvanje vanredne profesorice, kandidatkinja je učestvovala u realizaciji sljedećih naučnoistraživačkih projekata:

6.1. Učešće u projektu Sloboda izražavanja i sloboda medija u jugoistočnoj Evropi (JUFREX 2), Zajednička akcija Evropske unije/Savjeta Europe (2019.-2022.).

Kandidatkinja je dostavila dokaz: Potvrdu izdatu od strane v. d. direktora CEST-a i Vijeća za štampu da je bila učesnica istraživačica u projektu „Sloboda izražavanja i sloboda medija u jugoistočnoj Evropi (JUFREX2), 5.2019. – 12.2022. Zajednička akcija Evropske unije/Savjeta Europe. Ovaj projekat je ugrađen u „Horizontalni instrument za Zapadni Balkan i Tursku 2019-2022“.

„Horizontal Facility za Zapadni Balkan i Tursku 2019–2022“ je zajednička inicijativa Evropske unije i Savjeta Europe koja je korisnicima programa pružila podršku pri provođenju reformskih agendi u oblastima ljudskih prava, vladavine prava i demokratije i pomogla im pri usklađivanju sa evropskim standardima i pravnim tekovinama Evropske unije u okviru procesa proširenja, gdje je to relevantno. Ovaj trogodišnji program obuhvatao je projekte u Albaniji, Bosni i Hercegovini, Crnoj Gori, Sjevernoj Makedoniji, Srbiji, Turskoj, kao i na Kosovu, a Savjet Europe ga je provodio od maja 2019. godine.

Ovaj projekt se oslanja na prethodni regionalni zajednički program Evropske unije i Savjeta Evrope: Jačanje pravosudne ekspertize o slobodi izražavanja i medija u Jugoistočnoj Evropi (JUFREX), koji je realizovan od 2016. do 2019. godine. Cilj je bio da se unaprijedi sloboda izražavanja i sloboda medija u skladu sa evropskim standardima u tom domenu; da se unaprijedi primjena tih standarda angažiranjem niza aktera u Albaniji, Bosni i Hercegovini, na Kosovu, u Crnoj Gori, Sjevernoj Makedoniji i Srbiji, odgovornih za primjenu tih standarda u okviru svog svakodnevnog posla, naime: sudija, tužilaca, advokata, policijskih službenika, predstavnika regulatornih tijela za medije i studenata; da se konsoliduje platforma za regionalnu saradnju, diskusiju i razmjenu dobrih praksi.

Kandidatkinja je u navedenom projektu učestvovala kroz tri vida djelovanja: 1) radeći istraživanje sudske prakse za govor mržnje u cijeloj BiH; 2) održavajući edukaciju za sudije, tužitelje, advokate i policijske službenike i 3) održavajući seminar za predstavnike regulatornih tijela za medije u organizaciji CEST-a i Vijeća za štampu.

6.2. Učešće u projektu Povećanje pravosudnih kapaciteta u Bosni i Hercegovini radi harmonizacije domaće sudske prakse i usklađivanja s evropskim pravnim standardima, Britansko veleposlanstvo u Sarajevu i AIRE centar (2019.-2022).

Kandidatkinja je dostavila dokaz: Potvrdu izdatu od strane v. d. direktora CEST-a o učešću u projektu pod nazivom "Povećanje pravosudnih kapaciteta u Bosni i Hercegovini radi harmonizacije domaće sudske prakse i usklađivanja s evropskim pravnim standardima", koji je finansiralo Britansko veleposlanstvo u Sarajevu, a implementirao AIRE centar, započeo je aprila 2019. i trajao do marta 2022. godine. Projekt je predviđao jačanje implementacije evropskih pravnih standarda u Bosni i Hercegovini, a posebno Evropske konvencije o ljudskim pravima u praksi domaćih sudova, što doprinosi jačanju pravosudnih kapaciteta u Bosni i Hercegovini radi harmonizacije domaće sudske prakse.

Navedenim projektom Ustavni sud BiH osigurao je značajnu poziciju na polju edukacije kada se radi o suradnji u oblasti organiziranja konferencija i seminara i u oblasti harmonizacije pravnog sustava u Bosni i Hercegovini. Naime, organizacija stručnih konferencija najviših sudova u okviru Pravosudnog foruma u BiH, koju su zajednički inicirali i održavali kroz ovaj projekat Ustavni sud i AIRE centar, pokazala je koliko je potrebno da sustav u BiH, koji je samoorganizirajući i na visokoj profesionalnoj razini, ukaže na probleme u međusobnom odnosu sudskih odluka. Stoga je Pravosudni forum ključna točka zajedničkog djelovanja pravosudnog sustava u BiH. Sudjelovanje izuzetnih stručnjaka iz Ujedinjenog Kraljevstva je doprinijelo našoj praksi i teoretskom saznanju.

Kandidatkinja je u ovom projektu vodila istraživanja u pogledu sudske prakse u praksi sudova u BiH, te je rezultate istraživanja objavila u publikaciji pod nazivom „Izabrani segmenti iz oblasti ljudskih prava“ A. Murtezić (ured.), Sarajevo, JU Centar za edukaciju sudija i tužilaca F BiH, 2021, str. 141-159. Također je u okviru ovog projekta izradila recenziju za knjigu pod naslovom „Govor mržnje online i u drugom javnom prostoru“, autora Trlin, D. & Tadić-Stojisavljević, T., Centar za edukaciju sudija i tužilaca Federacije Bosne i Hercegovine, 2021, str. 152.

6.3. Učešće u FIGAP II Programu u saradnji sa Gender Centrom Federacije Bosne i Hercegovine (12.2022.)

Kandidatkinja je podnijela dokaz: Potvrdu izdata od direktorice Gender Centra Federacije Bosne i Hercegovine o učešću u FIGAP II Programu - u okviru konferencije „Multidisciplinarni pristup prevenciji i borbi protiv femicida i nasilja u porodici“. Kandidatkinja je obavila poslove pripreme i izlaganja u ulozi panelistice u panelu: „Femicid – prevencija kroz multidisciplinarni pristup“.

FIGAP II program je zajednički projekt Agencije za ravnopravnost spolova Bosne i Hercegovine, Ministarstva za ljudska prava i izbjeglice u suradnji sa Gender Centrom Federacije Bosne i Hercegovine i Gender centrom Republike Srpske sa ciljem osiguranja sredstva za provedbu Gender Akcionog Plana Bosne i Hercegovine. Program FIGAP-a II je usmjeren na izgradnju kapaciteta i odgovornosti za uvođenje principa ravnopravnosti spolova u BiH i jačanje provedbe i odgovornosti za provedbu GAP BiH. FIGAP II je Finansijski mehanizam za provedbu Gender akcionog plana BiH 2018 – 2021 sa sljedećim programskim ciljevima: 1) uspostavljene rodno – odgovorne politike u prioritetnim oblastima (rodno zasnovano nasilje, ekonomsko osnaživanje žena, učešće u javnom i političkom životu), 2) osposobljeni institucionalni mehanizmi i strukture za ravnopravnost spolova da djeluju u skladu sa definiranim mandatima, 3) uspostavljeni efikasni sistemi za podršku uvođenju i primjeni standarda ravnopravnosti spolova i 4) osposobljeni i održivi stručni kapaciteti u Bosni i Hercegovini za uvođenje, primjenu i promoviranje standarda ravnopravnosti spolova.

6.4. Učešće u Radnoj grupi za izradu prijedloga Zakona o izmjenama i dopunama Zakona o oduzimanju nezakonito stečene imovine krivičnim djelom Federacije Bosne i Hercegovine

Kandidatkinja je 2023. godine imenovana u Radnu grupu za izradu prijedloga Zakona o izmjenama i dopunama Zakona o oduzimanju nezakonito stečene imovine krivičnim djelom. Uz prijavu je podnijela dokaz: Uvjerenje izdato od strane v. d. direktora Federalne agencije za upravljanje oduzetom imovinom. Kao članica pružala je stručne savjetodavne usluge vezano za izradu prijedloga navedenog Zakona.

6.5. Učešće u Radnoj grupi za izradu Strategije za oduzimanje nezakonito stečene imovine krivičnim djelom i Akcionog plana za njeno izvršenje

Kandidatkinja je marta 2023. godine imenovana u radnu grupu za izradu Strategije za oduzimanje nezakonito stečene imovine krivičnim djelom, kao i Akcionog plana za njeno izvršenje. Uz prijavu je podnijela dokaz: Uvjerenje izdato od strane v. d. direktora Federalne agencije za upravljanje oduzetom imovinom.

Rad na nacrtu Strategije i rad na Nacrtu Akcionog plana za njeno izvršenje kroz diskusije, prijedloge i sugestije kao i uvrštavanje zaključaka u radni materijal i uspostavljanje mehanizama za provođenje i realizaciju.

6.6. Učešće u Radnoj grupi za izradu Modula specijalističke obuke za pravosudnu zajednicu

Kandidatkinja je podnijela dokaz: Uvjerenje izdato od strane v. d. direktora Federalne agencije za upravljanje oduzetom imovinom o učešću u Radnoj grupi za izradu Modula specijalističke obuke za pravosudnu zajednicu. U Uvjerenju je navedeno da je kandidatkinja dala izuzetan doprinos kroz radne sastanke vezano za stručno obrazovanje i usavršavanje državnih i policijskih službenika i nosilaca pravosudnih funkcija u vezi sa finansijskim istragama i oduzimanjem imovinske koristi pribavljene krivičnim djelom.

Zaključak IV

Kandidatkinja ispunjava uvjet vezan za originalni stručni uspjeh kao što je projekt, patent ili originalni metod.

7. Uspješno mentorstvo najmanje po jednog kandidata za stepen drugog odnosno integrisanog ciklusa studija i trećeg ciklusa studija

Dr Amila Ferhatović je od maja 2019. godine vanredna profesorica na Katedri krivičnog prava Univerziteta u Sarajevu – Pravnog fakulteta i učestvuje u realizaciji nastavnih aktivnosti

(predavanja, vježbe, konsultacije, ispiti) na prvom, drugom i trećem ciklusu studija na predmetima koji pripadaju naučnoj oblasti Krivično pravo, i to:

- na prvom ciklusu studija: Krivično pravo I (obavezni predmet, III semestar), Krivično pravo II (obavezni predmet, IV semestar), Kriminalistika (obavezni predmet, VI semestar), Kriminologija (izborni predmet, IV semestar), Viktimologija (izborni predmet, IV semestar), Međunarodno krivično pravo (izborni predmet, VI semestar), Sudska medicina (izborni predmet, VI semestar), Medicinsko krivično pravo (izborni predmet, IV semestar).
- Na drugom ciklusu studija u okviru sljedećih smjerova na predmetima: 1) Smjer Maloljetničko prestupništvo: Maloljetničko krivično pravo (obavezni predmet), Kriminalitet na štetu maloljetnika (izborni predmet) i Maloljetničko prekršajno pravo (izborni predmet); 2) Krivičnopravni smjer: Oduzimanje nezakonito stečene imovine (obavezni predmet), Organizirani kriminal (obavezni predmet), Metodika istraživanja privrednog kriminala (izborni predmet), Prošireno oduzimanje nezakonito stečene imovine (izborni predmet); Smjer Krivično pravo: Krivično pravo – izabrane teme (obavezni predmet), Nasilnički kriminal (obavezni predmet), Metodika istraživanja krivičnih djela (izborni predmet).
- Na trećem ciklusu studija: Krivično pravo (obavezni predmet), Komparativno i međunarodno krivično pravo – izabrane teme (obavezni predmet), Aplikativna kriminologija (izborni predmet), Ekološki kriminal (izabrane teme), Mjere sigurnosti u savremenom uporednom krivičnom pravu (izborni predmet), Odgovornost pravnih osoba za krivična djela (izborni predmet).

7.1. Mentorstvo na drugom ciklusu studija

Kandidatkinja je dostavila potvrdu izdatu od dekanice Univerziteta u Sarajevu – Pravnog fakulteta broj: 02-2073-1/24 od 30.12.2024. godine kojom potvrđuje da je nakon izbora u zvanje vanredne profesorice uspješno ostvarila **dvadeset osam (28)** mentorstava pri izradi i odbrani završnih radova II ciklusa studija na Univerzitetu u Sarajevu – Pravnom fakultetu.

Obzirom da je angažirana u realizaciji nastave i na Sveučilištu u Mostaru – Pravnom fakultetu, kandidatkinja je dostavila potvrđnicu dekanice broj: 5-18/25 od 08.01.2025. godine kojom se potvrđuje da je nakon izbora u zvanje vanredne profesorice bila mentorica pri izradi i odbrani diplomskih radova za **devet (9)** studenata diplomskog studija Kriminalistika i sigurnosni menadžment (drugi ciklus studija) na Pravnom fakultetu Sveučilišta u Mostaru. Uz potvrđnicu je dostavljen i popis diplomanata diplomskog studija Kriminalistika i sigurnosni menadžment (drugi ciklus studija) kojima je kandidatkinja bila mentorica, teme diplomskih radova i datumi odbrana.

7.2. Mentorstva na trećem ciklusu studija

Kandidatkinja je dostavila potvrdu izdatu od dekanice Univerziteta u Sarajevu – Pravnog fakulteta broj: 02-2073-2/24 od 30.12.2024. godine kojom potvrđuje da je nakon izbora u zvanje vanredne profesorice uspješno ostvarila mentorstvo pri izradi i odbrani doktorske disertacije pod naslovom „Kompjuterski kriminal – globalni i unutrašnji sigurnosni izazov i prijetnja“ doktoranta Mr. sci. Ensada Kormana. Mentorstvo je uspješno okončano odbranom doktorske disertacije 14.11.2024. godine.

Obzirom na angažman kandidatkinje i u realizaciji nastave i na Sveučilištu u Mostaru – Pravnom fakultetu, kandidatkinja je dostavila potvrđnicu dekanice broj: 5-19/25 od 08.01.2025. godine kojom se potvrđuje da je nakon izbora u zvanje vanredne profesorice bila mentorica pri izradi i odbrani dokorskog rada pod naslovom „Trgovina ljudskim organima kao oblik organiziranog kriminaliteta“ doktoranta Fezija Bećirija na Poslijediplomskog doktorskom studiju iz pravnih znanosti (treći ciklus studija) na Pravnom fakultetu Sveučilišta u Mostaru. Odbrana dokorskog rada održana je i uspješno okončana 09.02.2022. godine.

Zaključak V

Kandidatkinja ispunjava uvjet vezan za uspješno mentorstvo jednog kandidata za stepen drugog ciklusa i jednog kandidata trećeg ciklusa studija, budući da je u periodu nakon izbora u zvanje vanredne profesorice ostvarila ukupno trideset sedam (37) mentorstava na drugom i dva (2) mentorstva na trećem ciklusu studija.

8. Ostale aktivnosti

Kandidatkinja je prodekanica na nastavu i studentska pitanja od 2021. godine. U navedenoj ulozi učestvovala je i učestvuje u radu brojnih tijela Univerziteta i Fakulteta koji rješavaju pitanje iz djelokruga njenog rada. Pored svih poslova iz djelokruga rada prodekana za nastavu i studentska pitanja, organizirala je i rukovodila brojnim vannastavnim aktivnostima studenata, te u njima učestvovala i kao predavač. Članica je i Etičkog odbora Univerziteta u Sarajevu – Pravnog fakulteta.

Angažirana je na Sveučilištu u Mostaru – Pravnom fakultetu u realizaciji nastavnog procesa na predmetima Oduzimanje protupravno stečene imovine i Viktimologija, na Policijskoj akademiji Federalnog ministarstva unutrašnjih poslova na predmetima Uvod u kriminalistiku, Kriminalistika sa kriminologijom, Savremeni sigurnosni izazovi. Dugogodišnja je edukatorica u JU Centar za edukaciju sudija i tužilaca u Federaciji Bosne i Hercegovine.

Suradna je članica Internacionalne akademije nauka i umjetnosti u Bosni u Hercegovini (IANUBIH) od 2021. godine. Članica Upravnog odbora LOK mikrokreditne fondacije Sarajevo.

Članica uredničkog savjetodavnog odbora (Editorial Advisory Board) časopisa Journal of Penal Law and Criminology.

Komisija također cijeni da je učešće u navedenim međunarodnim skupovima jasan pokazatelj da je kandidatkinja prepoznata kao stručnjak iz svoje oblasti i u međunarodnim okvirima. Posebno ističemo svjetske kongrese krivičnog prava na koji je po treći put pozvana *ad personam* sa svojom saradnicom kao jedine iz Bosne i Hercegovine. Komisija također cijeni i posebno valorizira interesovanje kandidatkinje i za najistaknutije dodirne tačke medicine i prava, što je vidljivo ne samo iz učešća na Kongresu medicinskog prava, već i iz brojnih radova na temu medicinskog (krivičnog) prava.

Komisija također cijeni činjenicu da kandidatkinja pokazuje izuzetnu brigu i posvećenost za napredovanje naučnog podmlatka. Naime, kandidatkinja je pokazala izuzetne rezultate u nastavnom radu u skladu sa smjernicama definiranim odredbom tačke II. (8) Upute o realizaciji izbora u isto ili više akademsko zvanje na Univerzitetu u Sarajevu u skladu sa uslovima propisanim ranijim Zakonom. Od 2018. godine, kada je Kanita Pruščanović angažirana kao stručna saradnica, koja je potom 2022. izabrana u zvanje više asistentice na naučnoj oblasti Krivično pravo, kandidatkinja ju je uključivala u zajednički naučnoistraživački rad. Slijedom navedenog učestvovala su zajedno i bile koautorice pri izlaganjima u radu nekoliko međunarodnih konferencija i nekoliko naučnih radova.

ZAKLJUČNA OCJENA I PRIJEDLOG KOMISIJE

Na konkurs za izbor jednog nastavnika/ice u akademsko zvanje redovnog/e profesora/ice na naučnoj oblasti Krivično pravo na Univerzitetu u Sarajevu – Pravnom fakultetu, objavljenog 30.12.2024. godine u dnevnom listu "Dnevni avaz", na službenoj internet stranici Pravnog fakulteta (www.pfsa.unsa.ba), te službenoj internet stranici Univerziteta u Sarajevu (www.unsa.ba) prijavila se jedna (1) kandidatkinja:

- Dr. Amila Ferhatović, vanredna profesorica na Univerzitetu u Sarajevu – Pravni fakultet, na naučnoj oblasti Krivično pravo.

U postupku pripremanja prijedloga za izbor u akademsko zvanje redovne profesorice na naučnoj oblasti Krivično pravo, Komisija je ispunjenost uvjeta za izbor u akademsko zvanje redovne profesorice procjenjivala shodno objavljenom konkursu, prema odredbi člana 96. stav (1) ZVO 2017 koji je prestao da važi, a procesna pravila koja su utvrđena važećim ZVO 2022, te Statutom univerziteta u Sarajevu i Uputama i realizaciji izbora u isto ili više akademsko zvanje na Univerzitetu u Sarajevu u skladu sa uvjetima propisanim ranijim Zakonom.

Nakon analize i ocjene navedene prijave i dokumentacije, Komisija je utvrdila sljedeće:

1. Kandidatkinja je provela jedan izborni period u zvanju vanredne profesorice

U zvanje vanredne profesorice na naučnoj oblasti Krivično pravo izabrana je 27.05.2019. godine na period od šest godina (27.05.2025.). Procedura za izbor člana akademskog osoblja u isto ili više zvanje u skladu sa dinamičkim planom potreba pokreće se najkasnije četiri, a najranije šest mjeseci prije isteka izbornog perioda postojećeg člana akademskog osoblja i ne smatra se prijevremenim izborom (čl. 121 stav 2 ZVO 2022). Početak procedure u skladu sa Uputama izbora u isto ili više zvanje na Univerzitetu u Sarajevu vezuje se za raspisivanje, odnosno javnu objavu konkursa. Konkurs je raspisan blagovremeno, 18.12.2024. godine, dakle, pet (5) mjeseci prije isteka izbornog perioda. Slijedom navedenog, Komisija konstatira da kandidatkinja ispunjava traženi uvjet.

2. Kandidatkinja je objavila najmanje osam (8) naučnih radova objavljenih u priznatim publikacijama

Od izbora u zvanje vanredne profesorice kandidatkinja je objavila 13 radova. Šest (6) je ocijenjeno kao izvorni naučni radovi, pet (5) kao pregledni naučni radovi, jedan (1) kao prethodno naučno saopćenje i jedan (1) kao stručni rad. Deset (10) radova je objavljeno u priznatim publikacijama koje se nalaze u relevantnim bazama podataka, jedan (1) rad predstavlja poglavlje u univerzitetskom udžbeniku i dva (2) rada koja su objavljena, ali ne u priznatim publikacijama koje se nalaze u relevantnim naučnim bazama podataka.

Komisija je konstatirala da je kandidatkinja ispunila i kvantitativni i kvalitativni kriterij, te da je uvjet za izbor u zvanje redovnog/e profesora/ice u vezi sa brojem naučnih radova ispunjen.

Od izbora u zvanje asistentice 2006. godine do danas, kandidatkinja je objavila trideset jedan (31) rad i četiri (4) knjige, što dokazuje kontinuiranu posvećenost naučnoistraživačkom radu. Komisija ipak konstatira i posebno valorizira jedan poseban preokret nakon njenog izbora u zvanje vanredne profesorice, a to je interesovanje kandidatkinje i za druge naučne oblasti, na prvom mjestu medicinu. Dakle, kandidatkinja nužno pokazuje da posjeduje ekspertizu vezanu i za te druge naučne oblasti, a ne samo za krivično pravo, što je poseban kvalitet koji odlikuje njen naučnoistraživački rad i spremnost za interdisciplinarna istraživanja.

Ocjene pojedinih naučnih radova i knjiga su date prilikom njihovog detaljnijeg prikaza. Ukupna ocjena naučnog opusa kandidatkinje je, prema stajalištu Komisije, izuzetno visoka.

3. Kandidatkinja je objavila najmanje dvije (2) knjige

Od izbora u zvanje vanredne profesorice kandidatkinja je objavila dva univerzitetska udžbenika, čime je ispunila uvjet za izbor u zvanje redovne profesorice koji propisuje da je potrebno objaviti najmanje dvije knjige.

4. Kandidatkinja je ostvarila originalni stručni uspjeh kao što je projekt, patent ili originalni metod

Kandidatkinja je navela podatke i dokaze o učešću u tri (3) projekta, od kojih je jedan međunarodni, a sva tri su obzirom na ciljeve istraživanja od posebnog značaja. Svi projekti u kojima je kandidatkinja učestvovala rezultat su naučne saradnje i angažmana kandidatkinje na internacionalizaciji Univerziteta u Sarajevu, Pravnog fakulteta i realizirani su u pravilu kroz seminare, savjetovanja, konferencije i odražavaju višegodišnji naučnoistraživački rad kandidatkinje, a rezultati su objavljeni u odgovarajućim publikacijama.

Nesumnjivo, prema mišljenju Komisije, ovi projekti predstavljaju originalni stručni uspjeh a osim toga predstavljaju i značajan doprinos internacionalizaciji i vidljivosti Univerziteta u Sarajevu.

Nadalje, kandidatkinja je navela podatak i dokaz o učešću u Radnoj grupi za izradu prijedloga Zakona o izmjenama i dopunama Zakona o oduzimanju nezakonito stečene imovine krivičnim djelom Federacije Bosne i Hercegovine i Radnoj grupi za izradu Strategije za oduzimanje nezakonito stečene imovine krivičnim djelom i Akcionog plana za njeno izvršenje. Naime, napominjemo da je kandidatkinja bila članica Radne grupe za izradu Zakona o oduzimanju imovinske koristi ostvarene krivičnim djelom i prekršajem u Federaciji Bosne i Hercegovine 2012. godine. Imenovanje kandidatkinje u radnu grupu za izmjene i dopune navedenog zakona, strategije i akcionog plana za njeno provođenje jedanaest godina poslije pokazatelj su kontinuirane posvećenosti navedenoj tematici, te prepoznatljivosti kandidatkinje kao eksperta u navedenoj oblasti.

Članstvom u Radnoj grupi za izradu Modula specijalističke obuke za pravosudnu zajednicu dala je nemjerljiv doprinos kroz radne sastanke vezano za stručno obrazovanje i usavršavanje državnih i policijskih službenika i nosilaca pravosudnih funkcija u vezi sa finansijskim istragama i oduzimanjem imovinske koristi pribavljene krivičnim djelom.

5. Kandidatkinja je ostvarila uspješno mentorstvo najmanje po jednog kandidata za stepen drugog odnosno integrisanog ciklusa studija i trećeg ciklusa studija.

Kandidatkinja ispunjava uvjet vezan za uspješno mentorstvo jednog kandidata za stepen drugog ciklusa i jednog kandidata trećeg ciklusa studija, budući da je u periodu nakon izbora

u zvanje vanredne profesorice ostvarila ukupno trideset sedam (37) mentorstava na drugom i dva (2) mentorstva na trećem ciklusu studija.

Kandidatkinja je pokazala izuzetan uspjeh u dosadašnjem nastavnom radu na predmetima naučne oblasti Krivično pravo imajući u vidu rezultate na osnovu evaluacije rada akademskog osoblja (kvalitet realizacije nastave na obaveznim i izbornim predmetima, te prolaznost studenata), kontinuiranog angažmana na drugoj visokoškolskoj ustanovi i drugim institucijama, te zainteresiranosti studenta/ica za izradu završnih i doktorskih radova pod njenim mentorstvom. Nastavničke sposobnosti i doprinos na osnovu rezultata evaluacije ukazuju da kandidatkinja u realizaciji nastave studentima/cama prenosi najnovija saznanja, zasnovana na rezultatima naučnih i stručnih istraživanja uz primjenu suvremenih didaktičkih metoda, da nastavnu materiju izlaže na razumljiv način, promovirajući koncept interaktivnog učenja.

6. U skladu sa Smjernicama i kriterijima za način vrednovanja uvjeta za izbore u akademska zvanja iz član 227. stav (2) Statuta, Komisija je vrednovala i cijeni da je kandidatkinja dokazala da posjeduje sljedeće:

- a) nastavničke sposobnosti** i doprinos koji obuhvata kroz: kvalitet realizacije nastave na obaveznim i izbornim predmetima, prolaznost studenata, rad sa studentima na vannastavnim aktivnostima, inoviranje nastavnog procesa, dodatno opterećenje u nastavnom procesu, brojna mentorstva za završne radove i doktorske teze, učešće u brojnim komisijama za odbranu završnih radova, učešće u radu komisije za revidiranje studijskog programa;
- b) doprinos procesu internacionalizacije** kroz: međunarodnu mobilnost, učešće u aktivnosti strategije internacionalizacije Univerziteta, učešće u kreiranju i realizaciji cikličnih studijskih programa, učešće u prestižnim međunarodnim konferencijama, učešće u uređivačkim odborima međunarodnih časopisa, učešće u naučnim i organizacionim odborima međunarodnih konferencija, učešće u komisijama za izbor na inostranim visokoškolskim ustanovama, realizaciju gostujućih predavanja na međunarodnim konferencijama, visokoškolskim institucijama i međunarodnim udruženjima i asocijacijama;
- c) društveni doprinos** koji obuhvata: učešće u savjetodavnim tijelima institucija od šireg društvenog značaja, članstvo u organima upravljanja privrednih subjekata, rad na realizaciji aktivnosti vezanih za unapređenje institucije i razvoj zajednice, recenzije naučnih radova, knjiga i monografija.

* * *

Imajući u vidu sve naprijed navedene činjenice i dokaze Komisija jednoglasno zaključuje da kandidatkinja dr. Amila Ferhatović ispunjava sve uvjete za izbor u akademsko zvanje redovna profesorica propisane ZVO 2017, ali ne samo minimalne uvjete, već ih ispunjava u mjeri koja se može cijeniti izuzetnom. Komisija cijeni da je riječ o kandidatkinji koja je ostvarila izvanredne rezultate u svom dosadašnjem akademskom, naučnom i nastavnom radu.

Slijedom navedenog, Komisija Vijeću Univerziteta u Sarajevu – Pravnog fakulteta upućuje

PRIJEDLOG

da se dr. Amila Ferhatović izabere u akademsko zvanje redovna profesorica na naučnoj oblasti Krivično pravo na Univerzitetu u Sarajevu – Pravnom fakultetu.

KOMISIJA

akademik, dr. Borislav Petrović, profesor emeritus, predsjednik

dr. Anita Kurtović Mišić, profesorica emeritus, članica

prof. dr. Davor Derenčinović, član